


TEZAU LITURGIC

13 OCTOMBRIE

**SLUJBA
SF. PREOȚI-MUCENICI
NICOLAE
ERMOLOV
ȘI
INOCHENTIE
KIKIN
DE LA NOVOSIBIRSK**



**MINEIUL PE OCTOMBRIE
MOSCOVA**



Ме́сяца октяб́ря в 13-й де́нь Святы́х священному́чеников Никола́я и Иннокенти́я, пресви́теров Новосиби́рских

НА ВЕЛИЦЕЙ ВЕЧЕРНИ

Блаже́н муж: 1-й антифо́н. На Го́споди,
возва́х: стихи́ры на 8, глас 8:

Прииди́те, восхва́лим Новосиби́рския
новому́ченики:/ сии́ бо непови́нно от
беззако́нных пострада́ша/ и побе́ду от Бо́га на
безбо́жие улу́чиша,/ ны́не же кро́вию свое́ю
спасе́ние нам при́сно ходата́йствуют.// Тех
моли́твами, Христе́ Бо́же, поми́луй нас.

Мир Ликийских предивно́му чудотво́рцу
тезоимени́те,/ новому́чениче Нико́лае,/
победоно́сец во страда́ниях показа́лся еси́,/
па́ству свою́ в ве́ре сохрани́в,// пра́вило ве́ры и
о́браз кро́тости яви́л еси́.

Непоро́чно служе́ние Бо́гу соверши́л еси́,/
непоро́чности соиме́нниче,/ новому́чениче
Иннокенти́е,/ моля́щихся тебе́ в ве́ре непоро́чне

утверди́, // да при́имем от Бо́га нетле́нныя
венцы́.

Му́ченик лет дре́вних подража́телие / и но́вых
лю́тых страда́ний прича́стницы, / земли́
Сиби́рския украше́ние / и гра́да Новосиби́рска
сла́ва церко́вная, / моли́тесь о воспева́ющих
страда́ния ва́ша, // я́же за Христа́ претерпе́ли
есте́.

Егда́ Бо́жиим попу́щением / Русь Свята́я
претерпева́ше страда́ния ве́лия, / тогда́ Госпо́дь
Помо́щник и Покрови́тель бысть во спасе́ние
избра́нным Свои́м, // воздвиза́я на по́двиги
новому́ченики и испове́дники Своя́.

Па́стырь до́брый ду́шу свою́ полага́ет за о́вцы
своя́, / рече́ Пастыренача́льник Христос́, /
па́стыри до́брыя Никола́я и Иннокенти́я /
приводя́, я́ко свиде́тели крестных страда́ний
Свои́х, / тии́ бо соприча́стницы страсте́й
Христóвых бы́ша / и в крѣ́пости своѣ́й си́лу
Воскресе́ния Его́ яви́ша, // путь указу́юще нам в
Ца́рствие Небе́сное.

Христу́, на́шего ра́ди спасе́ния
пострада́вшему / и воскрѣ́сшему в тре́тий день
по Писа́нием, / свя́тии Нико́лае и Иннокенти́е,
да́же до сме́рти послѣ́довали есте́, / да и мы,

взира́юще на страда́ния ва́ша,/ не отри́нем
креста́ своего́, // показу́ющего путь к
Воскресе́нию.

А́гнец Бо́жий,/ взема́й грех ми́ра,/ грядёт со
сла́вою/ суди́ти мир и возда́ти коемúждо по
дело́м его́,/ да сподо́бимся и мы
предста́тельством ново́мучеников и
испове́дников Це́ркве Ру́сския// улучи́ти от
Судии́ Пра́веднаго ве́лию ми́лость.

Сла́ва, глас 6:

Прииди́те, благоче́стия рачи́телие,/ от коне́ц
земли́ Сибир́ския хла́дныя/ те́пле восхва́лим
священномученики Никола́я и Иннокенти́я,/ ти́и
бо, огнём любве́ ко Христу́ распаля́еми,/ ве́рою
Тро́ическою мучи́телей победи́ша,/ те́мже ны́не,
со упова́нием предстоя́ще Бо́гу, // мо́лятся о
душа́х на́ших.

И ны́не, Богоро́дичен, глас то́йже: Кто Тебе́ не
ублажи́т:

Вход. Проки́мен дне. И чтéния мученическая.

На литіи стихи́ры хра́ма. И
священномучеников, глас 2:

Апо́столов подража́телие/ и му́чеников
ревни́телие,/ новомученицы Нико́лае и
Иннокенти́е,/ безбо́жнаго преще́ния не
убоя́вшеся,/ ве́ру Христо́ву да́же до сме́рти
соблюдо́сте./ Ны́не же, ве́лие дерзнове́ние ко
Спа́су иму́ще,/ Того́ моли́те спасты́ся всем
нам,/ / па́мьять ва́шу че́стно пра́зднующим.

Сла́ва, глас 8:

Прииди́те, ве́рных собо́ри,/ новомученики
на́ша све́тло почти́м,/ вку́пе со святи́тели
Иннокенти́ем, Софрони́ем и Иоа́нном их
прославля́юще,/ и с му́чеником Васи́лием
Мангазе́йским ублажа́юще,/ и со все́ми святы́ми
в землі́ Сибі́рстей просия́вшими// па́мьять их
при́сно воспева́юще.

И ны́не, глас то́йже:

Влады́чице, приими́ моли́твы раб Твои́х/ и
изба́ви нас// от вся́кия ну́жды и печа́ли.

На стихо́вне, глас 2:

Земля́ Сибі́рская/ освяты́ся кро́вию
мно́жества новомучеников/ и Це́рковь Ру́сская

обога́тисѧ благода́тию испове́дников,/ те́мже
ны́не многострада́льцы/ ра́дуются в ли́це всех
святы́х, в землі Ру́сской просия́вших.// И́хже
моли́твами, Христе́ Бо́же, спаси́ ду́ши на́ша.

Стих: Воззва́ша пра́веднии,// и Госпо́дь
услы́ша их.

Воззва́ша ко Го́споду новому́ченицы,/ зря́ще
хра́мы Бо́жия поруга́емыя,/ и Госпо́дь услы́ша
их,/ ны́не бо це́ркви святы́я воздвиза́ются/ и
церко́вное благоле́пие умножа́ется./ Го́споди
сил, с на́ми бу́ди// и сохрани́ достоя́ние Твое́ до
сконча́ния ве́ка.

Стих: Мно́ги ско́рби пра́ведным,// и от все́х
их изба́вит ѧ́ Госпо́дь.

Мно́ги ско́рби пра́ведным,/ егда́ за
беззако́ния нечесті́вых оскудева́ют ве́ра и
благоче́стие,/ тогда́ Христо́с, А́гнец Бо́жий,/ И́же
всем хо́щет спастисѧ/ и в позна́ние істины
прии́ти,/ призыва́ет к подвиго́м крѣ́стным
избра́нныя а́гнцы Своя́,/ да, послѣ́дующе стопа́м
Его́,// с ра́достью теку́т в жизнь ве́чную.

Сла́ва, глас то́йже:

Се град Новосиби́рск, иде́же просла́ви
Госпо́дь святу́ю па́мять ва́шу,/ дво́ице

присносла́вная,/ ново́страда́льцы Нико́лае и
Иннокéнтие,/ мо́лит вас ны́не:/ охрани́те град
наш и всю зéмлю Сибíрскую/ от нахождéния
иноплемéнных и междоусóбных бра́ни,/ да
ти́хое и благода́тное житиé проживéм// во
вся́ком благочéстии и чистотé.

И ны́не, глас то́йже:

Непроходи́мая врата́,/ та́йно
запеча́тствованная,/ Благословéнная
Богоро́дице Дéво,/ приими́ моле́ния на́ша/ и
принеси́ Твоему́ Сы́ну и Бо́гу,// да спасéт Тобо́ю
ду́ши на́ша.

Тропа́рь священномучеником, глас 2:

Ве́лия правосла́вныя ве́ры исправле́ния:/ в
лю́тых гоне́ниях на Це́рковь Бо́жию,/ я́ко в
черто́зах упокоéния,/ в ра́нах и у́зах
ра́довастеся,/ Крест бо Христо́в на ра́мена
взе́мше,/ ве́рою и любóвию Тому́ послéдовали
естé/ в наде́жди живота́ ве́чнаго,/
новомученицы Нико́лае и Иннокéнтие,// моли́те
Пострада́вшего нас ра́ди спасти́ ду́ши на́ша.

Ин тропарь, глас 4:

Днесъ, благовернии людие, сошедшеся
восхвалим/ священномученик Новосибирских
двоицу Николая и Иннокентия:/ тии бо в годину
лютых гонений от безбожных пострадаша/ и
венцы нетленными от Христа Бога венчашася,/ и
ныне, предстояще Престолу Вседержителя,/ и
Того яко Блага молят/ утвердiti веру
православную,/ сохранiti Отечество наше в
благоденствии, // даровати мир и спасти души
наша.

НА УТРЕНИ

На Бог Господь: тропарь
священномучеником, дважды. Слава, и ныне,
Богородичен, глас 2: Вся паче смысла:

По 1-м стихословии седален, глас 4:

Ныне светло празднует Новониколаевск
град,/ идеже совершися прославление ваше,
священномученицы Николае и Иннокентие,/ и
ныне паства сибирская духовно торжествует/ и
храмы Божии иконами вашими украшаются,/ и
весеются грады и веси, идеже Богу усердно

послужили есте./ Того молите о почитающих вас,/ да дарует нам велию милость.

Слава, и ныне, Богородичен, глас тойже:

Богородицу песньми немолчными благочестно воспойм вопиюще:/ радуйся, Горю Святая;/ радуйся, Престоле огненосный всех Царя;/ радуйся, Ангелов Радосте и мучеников Славо.

По 2-м стихословии седален, глас 4:

Попечение имевше о служении Богу и пастве,/ за веру православную пострадали есте/ и воистину обители Пресвятыя Троицы явились есте, священномученицы Николасе и Иннокентие,/ также и, о суетных небрегше,/ Сокровище благих и жизни Подателя стяжали есте.

Слава, и ныне, Богородичен, глас тойже:

Мати Божия Пречистая,/ исцели ны от всякаго греха/ и очисти от всякия скверны душевныя и телесныя,/ и купно с новомученики земли Сибирския/ умоли Христа Спаса нашего спасти души наша.

Величание:

Велича́ем вас,/ свя́тии ново́мученицы
Нико́лае и Иннокéнтие,/ и чтим честна́я
страда́ния ва́ша,/ я́же за Христа́// претерпе́ли
е́сте.

Псалом избранный: Бог нам прибежище и
сила:

По полиелеи седален, глас 6:

Бо́дрствуйте, мужай́тесь и в ве́ре
укрепля́йтесь, глаго́лет апо́стол Па́вел;/
ново́мученицы же, глас его́ послу́шавше,/ ве́ру
Христо́ву соблюдо́ша,/ и, ны́не дерзнове́ние
иму́ще ко Спа́су,/ мо́лят спасти́ся нам.

Сла́ва, и ны́не, Богоро́дичен, глас то́йже:

Приими́, Богоро́дице, пёсni хвале́бныя, от
недостойных уст Тебе́ возно́симыя./ Мы бо, на
Твой покрóв надёюще́ся,/ со святы́ми
ново́мученики Твое́ ми́лостивое предста́тельство
прославля́ем.

Степе́нна, 1-й антифо́н 4-го гласа. Прокі́мен,
глас 4: Проидо́хом сквозе́ огонь и во́ду, // и извёл
ны еси́ в поко́й. Стих: Разже́гл ны еси́, я́коже
разжиза́ется серебро́. Ева́нгелие от Матфе́я,
зача́ло 36.

По 50-м псалмѣ стихира, глас 6:

Помилуй нас, Бóже,/ по велицей милости
Твоей/ и молитвами Пречистыя Твоея Матере/ и
всех новомучеников Църкве Русския//
беззакония наша очисти.

Канон священномучеников Николая и
Иннокентия, глас 8.

Песнь 1

Ирмос: Воду пройд, яко сушу,/ и
египетскаго зла избежав,/ израильтянин
вопияше:// Избавителю и Богу нашему поим.

Многими содержими напастьми,/ к вам
прибегаем, спасения взыскующе, о святїи
новомученицы и исповѣдницы,/ от тяжких и
лютых обстояний молитѣ спастися нам.

Страстей и пороков безстудных смущают
нашествия,/ яже многими печальми сокрушают
сердца наша;/ вы же, вернии воины Христоу
Николае и Иннокентие,/ испросите нам
душевную чистоту и крепость,/ священную
память вашу совершающим.

Лютая мучения за Христа претерпели есте,
славнии новомученицы,/ к вам простираем
смирѣнная молѣния,/ страданьми вашими в

вѣре укрепляеми,/ испросите Отѣчеству нашему мир/ и душам нашим велию милость.

Богородичен: Пречистая Дѣво Богородице,/ с новомученики и всеми святыми земли Сибирския/ умоли Всеблагаго Бога,/ да промышлением Божественным помилует и спасет всех нас.

Песнь 3

Ирмос: Небеснаго круга Верхотворче, Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ / Еди́не Человеколю́бче.

Верных утверждение суща, святии новомученицы,/ в вере Христове пребыли есте,/ ко пристанищу церковному окормляюще всех хотящих спастися/ и от ересей и соблазнов обновленческих паству свою заступающе.

Молим вас, двоице священная,/ разорити бурю новых соблазнов/ и сетей многовидных нас избавити,/ благочестно память вашу воспевающих.

Сокровище добродетелей духовных испросите нам, святии новомученицы,/ земная богатства и

утѣхи привре́менные/ Ца́рства ра́ди Христо́ва
презира́ти науча́юще.

Богоро́дичен: Исцелѣ́ний неду́гов душе́вных и
телѣ́сных/ про́сим от Тебе́, Пренепоро́чная
Де́во,/ исцелѣ́ний бо неоску́дное сокро́вище Тя
ве́мы, неизжива́емое.

Седа́лен, глас 3:

Кто ны разлучи́т от любве́ Бо́жия,/ Па́вел
возгласи́ небоше́ственный,/ ни скорбь, ни
теснота́, ни гоне́ния, ни смерть./ Та́кожде и вы,
святѣ́и новому́ченицы,/ любóвию, я́же ко
Христу́ Бо́гу, укрепля́еми,/ Небе́снаго Ца́рствия
достигли есте́,/ иде́же, со апо́столы веселя́щеся,/
ве́ру, любóвию споспешеству́емую, и спасе́ние
ве́чное/ испроси́те всем нам.

Сла́ва, и ны́не, Богоро́дичен, глас то́йже:

Богоро́дице Де́во,/ упова́ние христиа́ном,/
покры́й, соблюди́ и спаси́ на Тя упова́ющих.

Песнь 4

Ирмо́с: Услы́шах, Го́споди,/ смотре́ния Твоего́
та́инство,/ разуме́х дела́ Твоя́// и просла́вих
Твое́ Божество́.

Бурею прегрешений обуреваемы,/
благодатнаго утешения просим от Христа,
тишины Подателя, / вашими молитвами,
новомученицы земли Сибирския.

Наслаждающися духовною радостью в
памяти вашей, / святии Николае и Иннокентие, /
славу возсылаем Богу, прославльшему вас.

Одр болезни ко благочестию призывает / и
немощи телесныя просити от Бога исцеления
научают. / Вы же, святии новомученицы,
болезни многия за Христа претерпевше, /
здравие душевное и телесное испросите вас
почитающим.

Богородичен: Надежду на милость Всецарицы
Богородицы имуще, / скорбей и болезней многих
избавляемся, / благодарно за явленная и
неявленная к нам благодеяния, / яко всемогущую
Целительницу, воспевающе.

Песнь 5

Ирмос: Просвети нас повелении Твоими,
Господи, / и мышцею Твоею высокою / Твой мир
подаждь нам, // Человеколюбче.

Нетленную радость во свете лица Божия
улучивше, славнии новомученицы, / исполните

сердця́ на́ша неизрече́нною ра́достью/ о Бо́же,
Спаси́теле на́шем.

Изба́вите нас от бед и поги́бели ве́чныя,
страда́льцы Христо́вы,/ и благода́ть, вся́кое
земно́е мудрова́ние превосходя́щую,/ испроси́те
те́плыми ва́шими к Бо́гу моли́твами.

Просвеще́ния благода́тнаго сподо́би нас,
Христé, Свéте и́стинный,/ просвеща́й и
освяща́й вся́каго челове́ка, грядúщаго к Тебе́,
Со́лнцу правды,/ моли́твами новомúчеников,
Тебе́ ра́ди пострада́вших.

Богоро́дичен: Исцели́ болéзни многостра́стных
душ на́ших, Пренепоро́чная Богороди́тельнице,/
бла́гостию от Тебе́ Ро́ждшагося,/ и просвеще́ние
душе́вное ско́ро пода́ждь нам.

Песнь 6

Ирмо́с: Моли́тву пролию́ ко Го́споду,/ и Тому́
возвещу́ печа́ли моя́,/ я́ко зол душа́ моя́
испо́лнися,/ и живо́т мой а́ду прибли́жися,/ и
молю́ся, я́ко Ио́на:// от тли, Бо́же, возведи́ мя.

Ны́не смерть вам прибли́жися, вопия́ху
гоните́ли ва́ши,/ егда́ мно́зи лжесвидéтелие
клевету́ на вы воздвиза́ху, свя́тии Никóлае и
Иннокéнтие,/ вы же Христа́ не отреко́стеся,/ но

врагов злодейства мужески попрали есте,/ Пасху хваляще вечную.

Иона пророк возопи ко Господу, во чреве китове моляся,/ прообразуя погребение и востание Спасово тридневное,/ новомученицы же Церкви Русския посреде великих страданий моляхуся,/ Пасху славяще вечную.

Будите нам крепкое прибежище,/ славнии страдалцы Христовы Николае и Иннокентие,/ от потопа страстей и бед спасающе нас.

Богородичен: Спаса миру рождающая,/ молимся Тебе, Скоропослушнице нашей,/ спаси от бед рабы Твоя, Богородице,/ многопопечением суетным потопляемая.

Кондак, глас 8:

Веру Христову, яко щит,/ в сердце приемше, святии новомученицы,/ клеветы человеческия и лютых страданий не убоястися,/ но посреде мучений Бога призвасте,/ и ныне ускорите на помощь нашу,/ / яко приснославнии.

Икос:

Ангелов подражателие, новомученицы Николае и Иннокентие,/ со Ангелы ныне на Небесех радующесе,/ пение хвалебное примите

от нас, па́мьять ва́шу соверша́ющих,/ да ва́шими
 моли́твами прича́стницы жи́зни ве́чныя бу́дем./
 Те́мже, ны́не восхваля́юще вас, глаго́лем вам
 сицевая́:/ Ра́дуйтесь, я́ко ве́ру Христо́ву во у́зах
 и страда́ниях соблюдо́сте;/ ра́дуйтесь, я́ко
 смире́нием своимъ горды́ню гоните́лей
 посрами́сте./ Ра́дуйтесь, любо́вь ко Христу́, за
 ны пострада́вшему, ми́ру яви́вшии;/ ра́дуйтесь,
 се́ятели ненави́стныя ро́зны ми́ра сего́
 обличи́вшии./ Ра́дуйтесь, я́ко наде́жду на
 Христа́ непоколеб́иму сохрани́ли есте́;/
 ра́дуйтесь, я́ко иска́вшия погуби́ти ду́ши ва́ша и
 наде́ющия на си́лу свою́ немо́щны яви́ли
 есте́./ Ра́дуйтесь, я́ко во уничиже́нии ва́шем
 то́кмо о Кресте́ Христо́вом похвалу́ прия́сте;/
 ра́дуйтесь, я́ко сораспе́ншеся Христу́, с Нимъ
 просла́вистесь./ Ра́дуйтесь, я́ко всяк зол глаго́л
 Христа́ ради претерпе́сте на земли;/ ра́дуйтесь и
 весели́тесь, я́ко мзда ва́ша мно́га на Небеси́./
 Ра́дуйтесь, Нико́лае и Иннокенти́е, сла́внии
 новомученицы.

Песнь 7

Ирмо́с: От Иуде́и доше́дше, о́троцы/ в
 Вавило́не иногда́/ ве́рою Тро́ическою пла́мень

пѣщный попраша, поюще:// отцев Бóже, благословѣн еси.

Вавилон, сиречь греховное смешение,/ спасению мира противоборствует,/ вы же, новомученицы,/ верою Троическою безбожие поправше, Бóга призываєте:/ потщися на помощь нашу,/ вся бо можешь хотяи.

За законы отеческия в Вавилоне благочестивии юноши бедствия прияша,/ вы же, новомученицы земли Сибирския,/ за веру святую православную велия страдания претерпели есте;/ купно со всеми святыми молитесь Избавителя Бóга о воспевающих вас:/ отец наших Бóже, благословѣн еси.

За сокровища мирская и жизнь привременную/ не пременили есте сокровища духовная,/ святии новомученицы Никóлае и Иннокентие,/ но, врагов ухищрения поправше, непрестанно воспевали есте:/ отец наших Бóже, благословѣн еси.

Богородичен: Богородице Всепетая,/ телесныя немощи и душевныя недуги исцели,/ Спаса и Избавителя недугов рождшая.

Песнь 8

Ирмос: Царя Небеснаго,/ Егоже поют вои
ангельстии, // хвалите и превозносите во вся
веки.

Егда исполнися чаша страданий
новомучеников земли нашея,/ тогда призре
Господь на Церковь Русскую./ И ныне паки
зрим земное отечество наше/ храмы Божиими и
святыми обительми украшаемо во спасение нас
поющих:/ Избавителю Боже, благословен еси.

Страдания ваша честная прославляюще,/
святии Николасе и Иннокентие,/
благодарственная пения воспеваем/ дивному во
святых Своих Богу нашему.

Троичен: О Троице Святая, Единосущная и
Нераздельная,/ спаси всех нас,/ память
новомучеников Новосибирских светло
празднующих.

Богородичен: Зрящи поругание святого удела
Твоего, Богородице Дево,/ умоли Сына Своего
суд об Отечестве нашем преложити на милость./
Темже и ныне сохрани грады наша, Заступнице
усердная,/ Твои бо есмы раби,/ да не
постыдимся.

Песнь 9

Ирмѡс: Вои́стину Богоро́дицу/ Тя
испове́дуем,/ спасе́ннии Тобо́ю, Де́во Чи́стая,//
с безплѣ́тными ли́ки Тя велича́юще.

То́ка моле́ний нас, грѣ́шных, не отврати́теся,/
новомуче́ницы сла́внии Нико́лае и Иннокѣ́нтие,/
ва́ша по́двиги воспева́ющих/ и Бо́га
непреста́нно прославля́ющих.

Ра́дости духо́вныя сердца́ на́ша испо́лните,
святѣ́и новомуче́ницы,/ грехо́вныя обы́чаи
отгоня́юще/ и во благоче́стии наставля́юще.

Све́та Твоего́ заря́ми пресве́тлыми просвети́
нас, Спа́се,/ ублажа́ющих новомуче́ников Твои́х
Никола́я и Иннокѣ́нтія,/ со все́ми святы́ми, в
земли́ Сибѣ́рстей просия́вшими,/ в ни́хже
препросла́влен еси́.

Богоро́дичен: Ра́дуйся, Богоро́дице Де́во,/
ра́дуйся, земли́ Ру́сския Покро́ве,/ ра́дуйся,
Сибѣ́рския страны́ Засту́пнице,/ ра́дуйся,
градо́м и ве́сем на́шим огражде́ние.

Свети́лен:

Свет Христо́в просвети́л есть страну́
Сибѣ́рскую,/ Христо́вых благове́стников
проповѣ́данием./ По́двигами же новомуче́ников

свет Христо́в па́ки зѣмлю на́шу осиява́ет/ и
благодáть Божѣственная вѣрным пода́ется.

Сла́ва, и ны́не, Богоро́дичен:

Ма́ти Бо́жия,/ сохрани́ под кро́вом Твои́м
град наш/ и вся гра́ды и ве́си Сиби́рския/ и всю
зѣмлю Ру́сскую,/ благода́рно заступле́ние Твое́
воспева́ющую.

На хвалі́тех стихі́ры, глас 4:

Днесь свѣ́тло лику́ют гра́ди,/ иму́ще
предста́тельство ва́ше,/ новому́ченицы Нико́лае
и Иннокѣ́нтіе,/ прославля́юще страда́ния
ва́ша,/ / я́же за Христа́ претерпе́ли естѣ́.

Днесь воспева́ют па́мь
священному́чеников/ празднолю́бцы
церко́внии,/ днесь страна́ Сиби́рская/
по́двигами страда́льцев Христо́вых
обогаща́ется,/ вѣрныя на похвалѣ́ние их
созыва́юще// и воспева́юще вели́чье Бо́га
на́шего.

Днесь новому́ченицы Иннокѣ́нтий и Никола́й/
предстоя́т Престо́лу Влады́чню,/ сра́дующеся
сиби́рским согра́жданом,/ ве́ру правосла́вную
храня́щим// и святу́ю па́мь их соверша́ющим.

Днесь, вѣрнии лю́дие,/ прииді́те, поклони́мся
и припаде́м ко Христу́,/ пода́ющему нам
неоску́дную ми́лость/ предста́тельством
пресла́вных новомучеников,/ озари́вших луча́ми
доброт своих страну́ Сибі́рскую// и моля́щихся
прісно о душа́х на́ших.

Сла́ва, глас 6:

А́гнче Бо́жий,/ взема́й грехи́ ми́ра,/ приими́
моли́тву на́шу/ и да́руй оставле́ние мно́жества
грехо́в/ моли́твами новомучеников Никола́я и
Иннокенти́я, // благоче́стно па́мять их
соверша́ющим.

И ны́не, Богоро́дичен, глас то́йже:

Богоро́дице Влады́чице,/ всех скорбя́щих
Ра́досте/ и Засту́пнице всех христиа́н,/
ненаде́ющихся Наде́ждо,/ моле́ния на́ша
благоутро́бно приими́/ и Сы́ну Твоему́ и Бо́гу
принеси́// о спасе́нии душ на́ших.

Славосло́вие вели́кое. И отпу́ст.

НА ЛИТУРГИИ

Блаже́нны от канона, пёснѣ 3-я и 6-я.

Проки́мен, глас 4: Святы́м, ѿже суть на земли́
Его́, // удиви́ Госпо́дь вся хотѣ́ния Своя́ в них.

Стих: Предзрёх Го́спода предо мно́ю вы́ину,
я́ко одесну́ю мене́ есть, да не подви́жуся.

Апо́стол к Ри́мляном, зача́ло 99.

Аллилу́ия, глас 6: Свяще́нницы Твоя́ облеку́тся
в пра́вду, и преподо́бнии Твоя́ возра́дуются.

Стих: Бог нам прибе́жище и си́ла, Помо́щник
в ско́рбех, обрѣ́тших ны зело́.

Ева́нгелие от Иоа́нна, зача́ло 52.

Прича́стен: В па́мь вѣ́чную бу́дет
пра́ведник:

**[Утверждена Священным Синодом
Русской Православной Церкви 28.12.2017
(журнал № 131)]**

